

INUIT ATAQATIGIIT

INATSISARTUNI



2. august 2011

UKA 2011/53

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Qinersisarnermut inatsisip atuuttup ingammik qinersiviup ataasiinnaalersimaneranut tunngatillugu inuit tamat oqartussaaqqataanerannut tunngatillugu naleqquttuunersoq Naalakkersuisut misissueqqissaaqullugit peqquneqarnissaat siunertaralugu Inatsisartut aalajangiiffigisassaattut siunnersuut.

(Inatsisartuni ilaasortaq Naaja Nathanielsen, Inuit Ataqatigiit)

Tunngavilersuut:

Innuttaasut tamarmik inuiaqatigiit ineriartornerannut sunniuteqarsinnaanerminnik misigisaqarnissaat pingaaruteqarpoq, pingaartumillu ukiuni makkunani kommunit kattunneqarnerisa kingorna inuiaqatigiinnilu nutaaliornissanut suliniutit aallartisarnerini.

Tamakku tunuliaqutaralugit qinerseriaatsip maannamut atuuttup, tassalu nunarput ataatsimut qinersiviunera inuit oqartussaaqataanerannut qanoq pingaaruteqartiginersoq pillugu nalunaarusiortoqarnissaa kissaatigivara, pingaartumik nunap immikkoortuini avinngarusimasuni najugaqartut nunaqqatimik Inatsisartuni sinniisoqarsinnaanerata allaasereqquneqarluni.

Nuna tamakkerlugu imaluunniit nunap immikkoortuini immikkut qinersivinnik atuileqqinnissap pitsaaqutissaa ajoqutissaalu pillugit nalunaarusiaq imaqartinneqassaaq, taamaalilluni nalunaarut tunngavigalugu nutaamik qinerseriaaseqarnek eqquttariaqarnerseq, imaluunniit qinerseriaaseqarnerup maannakkut atuuttup naammaginartumik atortinneqarnerseq naliliivigisinnaaniassagatsigu.

Qinersiviit arlaqartut 1998-mi atorunnaarsinnerinut patsisaavoq nuna tamakkerlugu Inatsisartunut qinikkat nuna tamakkerlugu sullissinissaannik kaammattuerusunermik, qinikkat nunap immikkoortua aallaavigisartik namminerlu qinersivitsik pingaartinnerullugu qitiutitsinissaat pinaveersaarniarlugu. Nunap immikkoortuini ikittuinnarnik qinersisartoqarfiusuni Inatsisartuni nunaqqatit sinnerlugit sinniisoqalersinnaanerup ajornakusoorsinnaanera nuna tamakkerlugu qinersiveqalernerup sanngiissutaatut oqaatigineqarsimavoq. Nunarput ataatsimut maannakkutut qinersiviutinneqarnera nunatsinni inuit oqartussaaqataaneranut iluaqutaanersoq iluaqutaannginnersorluunniit Namminersorneq pillugu kalaallit Isumalioqatigiissitaanni oqaluuserineqarsimavoq.

Aningaasarsiornikkut allaffissornikkullu pisortanut kingunissaa

Siunnersuutip piviusunngortinnissaanut aammalu nalunaarutissap suliarineqarneranut aammalu nutsertinneqarneranut allaffissortitsinissaq naatsorsuutigineqassaaq, tamanna inuup atorfeqartitap pingajortitaanik aammalu ukiup affaata missaanik naleqarsinnaassasoq.

Siunnersuummi siunertarineqartoq allaffeqarfiup iluani suliarineqarsinnaangippat avataaniilli suleqatigisassanut suliaasiissutigineqartariaqassappat tamanna pisortanut 200.000 kr-it tungaanut aningaasartuuteqarfiusinnaavoq.

Aningaasarsiornikkut namminersorlutik inuutissarsiortunut sunniutissaa

Aningaasarsiornikkut namminersorlutik inuutissarsiortunut il. il. kinguneqarnissaa ilimagineqanngilaq.

Allaffissornikkut innuttaasunut kingunissaa

Allaffissornikkut innuttaasunut kinguneqarnissaa ilimagineqanngilaq.